

Skýrsla framkvæmdastjórnar um starfsemi Rekstrarfélags Sarps árið 2019

Ársskýrsla flutt á aðalfundi Rekstrarfélags Sarps haldinn í Reykjavík 27. maí 2020.

Landskerfi bókasafna hf. hefur umsjón með rekstri Rekstrarfélags Sarps í samræmi við þjónustusamning milli Landskerfis bókasafna hf. (LB) og Rekstrarfélags Sarps (RS).

Formlegt samstarf félaganna hófst að frumkvæði RS haustið 2013 með undirritun þjónustusamnings til tveggja ára. Nýr samningur til fjögurra ára var gerður á árinu 2015 með gildistíma til ágústloka 2019. Í kjölfarið var gerður nýr fjögurra ára þjónustusamningur með gildistíma til loka september 2023.

Markmið samstarfs RS og LB er að samnýta aðföng, auka gæðaeftirlit með skráningu í Sarp, stuðla að betri upplýsingagjöf til eigenda og notendaþjónustu auk þess að bæta aðgengi almennings að gögnum í Sarpi með því að gera þau aðgengileg í gegnum leitarvél, m.a. á vefnum leitir.is. Í þjónustusamningnum felst að LB sér um daglegan rekstur, stjórnun og starfsmannahald félagsins, samningagerð, áframhaldandi kerfisþróun og notendaþjónustu. Í byrjun árs 2020 flutti skrifstofa RS í Katrínartún 4, Reykjavík þar sem LB er nú til húsa.

Stjórnun félagsins

Samkvæmt samþykktum RS er stjórnun félagsins tvíþætt. Annars vegar skal félagið skipað níu manna fulltrúaráði og skal formaður koma frá Þjóðminjasafni Íslands. Hins vegar skal ráðið kjósa úr sínum hópi þriggja manna framkvæmdastjórn. Meginhlutverk fulltrúaráðs samkvæmt samþykktum félagsins er að ákveða stefnu þess, kjósa framkvæmdastjórn og hafa eftirlit með starfsemi RS.

Aðalfundur Rekstrarfélags Sarps var haldinn 15. maí 2019. Á fundinum var kjörið fulltrúaráð sem skipaðu: Þorbjörg Gunnarsdóttir, formaður og Inga Lára Baldvinsdóttir frá Þjóðminjasafni Íslands, Anna Guðný Ásgeirsdóttir og Dagný Heiðdal frá Listasafni Íslands, Ágústa Kristófersdóttir frá Hafnarborg, Gerður Róbertsdóttir frá Borgarsögusafni Reykjavíkur, Haraldur Þór Egilsson frá Minjasafninu á Akureyri, Ásta Hermannsdóttir frá Minjastofnun Íslands og Pétur Kristjánsson frá Tækniminjasafni Austurlands.

Fulltrúaráðið kom saman að loknum aðalfundi og kaus þriggja manna framkvæmdastjórn. Í stjórn voru kjörin: Anna Guðný Ásgeirsdóttir, formaður, Inga Lára Baldvinsdóttir, gjaldkeri og Gerður Róbertsdóttir, ritari. Varamenn voru kjörnir: Þorbjörg Gunnarsdóttir fyrir Ingu Láru, Dagný Heiðdal fyrir Önnu Guðnýju og Ágústa Kristófersdóttir fyrir Gerði. Er þetta í fyrsta skipti sem Listasafn Íslands, sem annað tveggja höfuðsafna í RS, fer með formennsku í framkvæmdastjórn en hingað til hefur þetta hlutverk verið á forræði Þjóðminjasafns Íslands.

Fulltrúaráðið var aftur boðað á fund í desember þar sem kynntar voru niðurstöður upplýsingaöflunar sem félagið réðst í á árinu vegna framtíðarþróunar Sarps. Aðrir fundir voru ekki haldnir í fulltrúaráðinu á árinu.

Framkvæmdastjórn

Framkvæmdastjórn félagsins fer með æðsta vald í málefnum þess á milli funda fulltrúaráðs og aðalfundar. Meginhlutverk framkvæmdastjórnar samkvæmt samþykktum félagsins er að hafa eftirlit með rekstri þess og sjá til þess að skipulag og starfsemi sé í góðu horfi, að taka ákvörðun

um veitingu notendaleyfa og setja gjaldskrá fyrir þjónustu félagsins. Á aðalfundi 2016 voru kynntar breytingar á uppbyggingu gjaldskrár félagsins sem tóku gildi á árinu 2017. Síðan þá er gjaldskráin þrepaskipt og tekur mið af ársverkafjölda aðildarsafns. Gjaldið hækkar á milli ára í takt við vísitölu neysluverðs. Gjaldskráin er aðgengileg á heimasíðu félagsins.

Framkvæmdastjórnin hélt alls 10 fundi á árinu 2019. Líkt og sagt hefur verið frá áður var í upphafi ársins farið í kynningarátakið *Sarpur – munir, myndir, minningar*. Aðdragandi þess var að fljótlega eftir að Sarpur var opnaður almenningi á sarpur.is varð þess vart að margir tengdu heitið Sarpur meira við vefupptökusafn Ríkisútvarpsins ohf. (RÚV) en við safnkost Sarpssafna. Í kjölfar þess að samningar náðust við RÚV um að stofnunin léti af notkun vörumerkisins var kominn grundvöllur til að kynna Sarp í þeim tilgangi að auðvelda landsmönnum að tengja heitið Sarpur við menningarsögulega gagnasafnið Sarp og sarpur.is. Hannaðar voru skjáauglýsingar, auglýsingar fyrir samfélagsmiðla, vefborði og veggspjald fyrir átakið. Stofnuð var fésbókarsíða fyrir Sarp, <https://www.facebook.com/sarpur.is/>. Vefborði kynningarherferðarinnar var birtur á sarpur.is 25. janúar og markaði það upphaf kynningarátaksins. Skjáauglýsingar í sjónvarpi RÚV voru birtar 32 sinnum á tímabilinu 25. janúar til 5. mars. Kostnaður við birtingu skjáauglýsinganna var allur greiddur af inneign sem RS átti hjá RÚV. Sameiginleg vefsýning Sarpssafna á sarpur.is undir heitinu *Æskan á millistríðsárunum* fór í loftið 1. febrúar. Á sama tíma var byrjað að birta kostaðar auglýsingar á fésbókinni og Instagram. Prentuðu veggspjaldi var dreift til allra aðildarsafna Sarps og þau hvött til að dreifa þeim sem víðast í sínu nærumhverfi. Veggspjaldið var birt sem auglýsing um miðjan febrúar í Morgunblaðinu og Bændablaðinu. Safnafólk var jafnframt hvatt til að skrifa greinar eða fara í viðtöl í fjölmiðlum og fjalla um Sarp út frá sínum safnkosti og urðu nokkrir safnamenn við þeirri beiðni. Átakið vakti nokkra athygli landsmanna. Vinum Sarps á fésbókinni fjölgaði hratt sem og heimsóknum á sarpur.is og nýjum notendum. Fyrirspurnir og myndapantanir jukust einnig mikið hjá söfnunum sjálfum.

Á árinu 2018 var samþykkt stefna um Sarp og sarpur.is þar sem segir m.a. „*Mikilvægt er að Sarpur haldi áfram að þróast og haldi áfram að uppfylla væntingar um notendavænt viðmót og aðgengi að upplýsingum.*„ Það var í þessum anda sem ákveðið var á árinu að hefjast handa við þekkingaröflun vegna nýs kerfis enda fer Sarpur 3 og sarpur.is að komast á aldur. Ákveðið var að byrja á að kynna sér þau skráningarkerfi sem eru í notkun í löndunum í kringum okkur og fá þannig yfirsýn yfir valkosti sem gætu verið í boði. Cecilie Gaihede starfandi fagstjóri Sarps fór í heimsókn til nágrannalandanna í þessum tilgangi. Fyrst var farið til Danmerkur, í heimsókn til Axiell fyrirtækisins sem er framleiðandi og eigandi SARA kerfisins sem þar hefur nýlega verið innleitt og byggir á Axiell Collections hugbúnaðinum. Einnig voru stofnanir og söfn sem nota SARA heimsótt og fræðst um upplifun þeirra af kerfinu. Næst var farið til Noregs til að kynna sér PRIMUS kerfið sem þar hefur um árabíl verið í notkun og haldnir fundir með Kultur IT sem er þróunaraðili kerfisins. Loks var farið í heimsóknir til safna sem nota PRIMUS til að fræðast um reynsluna af kerfinu. Í kjölfarið voru ritaðar skýrslur um heimsóknirnar og niðurstaða þeirra kynnt á fulltrúaráðsfundi í desember. Skýrslurnar eru aðgengilegar á þjónustuvef Landskerfis bókasafna,

<https://landskerfi.is/rekstrarfelag-sarps/felagid/fulltruarad/thekkingaroflun-2019/thekkingaroflun-2019>.

Margs konar lærdóm má draga af niðurstöðum upplýsingaöflunar um nýtt kerfi. Einn er sá að við val á nýju kerfi fyrir Sarp væri æskilegt að hafa Spectrum staðalinn til hliðsjónar. Collections Trust UK er umsjónaraðili staðalsins sem er hugsaður sem leiðarvísir í innra starfi safna. Um er að ræða fjölda ferla sem söfn innleiða eftir sínum þörfum. Kerfisframleiðendur geta að auki fengið vottun frá Collections Trust um að kerfi þeirra styðji við Spectrum vinnulagið. Bæði PRIMUS og SARA eru með slíka vottun. Áhugavert væri að fá Collections Trust til að kynna Spectrum staðalinn á vettvangi safna á Íslandi því hann gæti auðveldað

samræmingu vinnulags við til að mynda skráningu og þannig stuðlað að auknum gæðum hennar.

Í starfi félagsins er stöðugt leitað leiða til að auka gæði skráningar í Sarp. Á starfsárinu var gert átak í þessum málum með endurskoðun á Skráningarhandbók Sarps, breyttu fyrirkomulagi kennslu og upplýsingamiðlunar til notenda kerfisins svo nokkuð sé nefnt. Í dag er of algengt að skráning sé viðfangsefni tímabundinna starfskrafta á söfnum sem leiðir til þess að ekki byggist upp næg þekking á skráningu í Sarp á viðkomandi safni. Þetta þyrfti að breytast.

Á árinu hófst samtal félagsins og safnaráðs um að RS aðstoði við lögbundið eftirlit safnaráðs með skráningarverkefnum sem styrk hljóta úr safnasjóði. Komið var á ákveðnum leikreglum um vinnulag sem safnaráð kynnti í framhaldinu fyrir umsækjendum. Þegar þessar línur eru ritaðar er unnið að gerð verksamnings á milli safnaráðs og félagsins til að formfesta hlutverk aðila í eftirlitinu. Félagið fagnar þessu enda ætti þetta fyrirkomulag að geta stuðlað að auknum gæðum skráningar í Sarp.

Þjónustusamningur félagsins við Landskerfi bókasafna var endurskoðaður árinu og gerður nýr samningur sem tók gildi 1. október. Viðmið samningsins voru endurskoðuð, gengið frá vinnslusamningi og samið um afnot af upplýsingaöryggiskerfi LB. Í haust hefur samstarf félaganna staðið yfir um sjö ára skeið og því er komin góð reynsla á það. Það eru því komnar forsendur til að skoða hvert skuli stefnt með samstarf félaganna til framtíðar litið.

Starfsmannahald

Sveinbjörg Sveinsdóttir, framkvæmdastjóri LB, sinnti áfram starfi framkvæmdastjóra RS en sérfræðingar LB sinntu afmörkuðum verkefnum og ráðgjöf við RS í um 60% starfshlutfalli.

Vala Gunnarsdóttir sem gegnt hefur starfi fagstjóra Sarps frá árinu 2016 fór í fæðingarorlof í maí 2019. Cecilie Gaihede, sem ráðin var til eins árs til að leysa fagstjóra af á meðan á fæðingarorlofi stæði, kom til starfa nokkru áður. Allur launa- og launatengdur kostnaður sem fellur til hjá LB vegna fagstjóra Sarps er endurgreiddur af RS.

Verkaskipting á milli framkvæmdastjóra og fagstjóra Sarps er sú sama og áður, framkvæmdastjóri sinnir daglegum rekstri og starfsemi RS en fagstjóri heldur utan um kerfisþróun og notendapjónustu.

Rekstur RS

Félagið var rekið á grundvelli fjárhagsáætlunar sem samþykkt var í upphafi starfsársins.

Rekstrartekjur félagsins á árinu 2019 námu 36,8 millj. kr. en rekstrargjöld voru 31,8 millj. kr. Hagnaður ársins er 5,4 millj. kr.

Rekstrartekjur ársins eru tekjur vegna notendaleyfissamninga. Rekstrargjöld ársins skiptast í rekstrarkostnað kerfis 11,5 millj. kr., laun og tengd gjöld 9,5 millj. kr. og skrifstofu- og stjórnunarkostnað 10,8 millj. kr.

Bókfært eigið fé í lok árs 2019 er 37,0 millj. kr. Eignir RS eru á sama tíma 38,8 millj. kr. skv. efnahagsreikningi. Þar af eru um 22,8 millj. króna bundnar í Þróunarsjóði sem settur var á laggirnar á aðalfundi félagsins árið 2017 en hann lítur sérstökum verklagsreglum líkt og kemur fram í skýringu 5 í ársreikningi. Tilgangur með sjóðnum er að gera félaginu kleift að leggja til hliðar fjármuni til að standa straum af kostnaði vegna stærri skrepa varðandi kerfisþróun Sarps og sarpur.is. Þannig mun félagið vera betur fjárhagslega í stakk búið til að hefja vinnu við undirbúning vals á nýju kerfi.

Nánari upplýsingar er að finna í ársreikningi RS fyrir árið 2019.

Af vettvangi kerfisþróunar, viðhalds og reksturs

Samningur er við fyrirtækið Prógramm ehf. um forritun vegna viðhalds Sarps og þróunar kerfisins en öll þróunar- og viðhaldsvinna er unnin undir handleiðslu fagstjóra Sarps.

Á árinu voru kerfisuppfærslur, sem unnar eru í svokölluðum sprettum, alls sex talsins. Hér var bæði um minniháttar viðhald að ræða sem og ýmsar kerfisviðbætur. Sem dæmi má nefna að núna er notendum gert kleift að leita eftir aðföngum „í útláni“ bæði í yfirlitsgluggum í undirskrá og í nánari leit, unnin var lagfæring á birtingu mynda á sarpur.is svo hægt væri að tengja formöt önnur en JPEG, daglegar næturkeyrslur úr Sarpi yfir á sarpur.is voru teknar til gagnerrar endurskoðunar auk þess sem sett var öryggisskilríki á sarpur.is.

Mikið hefur verið unnið að og rýnt í tölur og réttmæti tölfræðiskýrslna úr Sarpi. Í ljós kom að vegna flækjustigs gagnagrunnsins þurfti að vinna með aðrar forsendur en upphaflega var gert ráð fyrir. Ástæðan fyrir á stundum misvísandi tölum voru villur í gagnagrunni sem undanfarið hefur verið unnið í að koma í lag. Útkoman er mikilvægt verkefni sem gerir það kleift að draga út tölfræðiupplýsingar úr Sarpi sem hefur ekki verið mögulegt áður. Samtals kölluðu 10 söfn eftir slíkum tölfræðiskýrslum.

Við vinnslu tölfræðiskýrslunnar komu upp mjög margar skráningar sem þurfti að rýna betur og út frá þessu myndaðist stórt tiltekta verkefni sem fagstjóri hefur unnið að og mun áfram vinna í samstarfi við söfnin og forritara Prógramms. Sem dæmi má nefna: Eldri prufuskráningar sem vistast í kerfinu þó að skráningarnar séu ekki lengur til, tvískráningar og skráningar án vistaðrar undirskrá. Talið er að umfang verkefnisins sé fleiri hundruð þúsunda álíka skráningar og er verkefnið komið vel á veg.

Líkt og sagt var frá á aðalfundi í fyrra fékkst ekki styrkur úr safnasjóði 2019 vegna verkefnisins *Birting upplýsinga um höfundarrétt í Sarpi*. Í ljósi mikilvægi verkefnisins sem tengist samningi sem Listasafn Íslands og Þjóðminjasafn Íslands gerðu við Myndstef 2018 um myndbirtingar á efni í safnmunaskrá sem eru í höfundarrétti var aftur sótt um styrk í safnasjóð haustið 2019.

Hýsing Sarps og sarpur.is er í höndum fyrirtækisins Þekking líkt og verið hefur.

Skráningarráð Sarps og skráningarhandbók

Skráningarráð Sarps hélt þrjá fundi á árinu 2019, í apríl, september og í desember. Hlutverk ráðsins, sem hefur verið starfrækt frá árinu 2015, er að stuðla að samræmingu og gæðum skráninga í Sarp. Meginverkefni ráðsins er umsjón með skráningarhandbók Sarps auk þess sem ráðið ályktar um álitamál sem varða skráningu.

Á vörfundum skráningarráðs lagði fagstjóri í afleysingu til að lögð yrði lokahönd á skráningarhandbók Sarps og var ákveðið að nota sumarið í það. Áður en haldinn var haustfundur skráningarráðs voru drög send á skráningarráð sem prófarkalas og var haustfundurinn nýttur í ábendingar, yfirferð og samþykki handbókarinnar. Á sama fundi var rætt hvernig hægt væri að auka gæði skráningar. Erfitt er að gera strangar kröfur á skrásetjara eins og þekktist í bókasafnageiranum, sérstaklega á það við um söfnin á landsbyggðinni. Því er mikilvægt að uppfæra og endurgera kennslumyndbönd og -efni og gera aðgengileg á netinu. Halda þarf áfram að ræða og þróa þessi mál.

Skráningarráð Sarps hefur sömuleiðis verið virkur samstarfsaðili í samtali RS og Safnaráðs um gerð gátlista og aukið eftirlit með skráningarverkefnum sem styrkt eru af ráðinu. Af því tilefni var haldinn aukafundur í desember þar sem Þóra Björk Ólafsdóttir framkvæmdastjóri Safnaráðs var viðstödd.

Heimasíða skráningarráðsins er: <https://www.landskerfi.is/rekstrarfelag-sarps/samstarfsadilar/-skraningarrad> og má þar nálgast fundargerðir frá fundum þess. Í ráðinu sitja: Þorvaldur Böðvarsson frá Þjóðminjasafni Íslands sem formaður, Anna Lísa Guðmundsdóttir frá Borgarsögusafni Reykjavíkur, Inga Lára Baldvinsdóttir frá Þjóðminjasafni Íslands, Nanna Þóra Áskelsdóttir frá Bygðasafni Akraness og Elín Guðjónsdóttir frá Listasafni Íslands.

Fjöldi notenda – nýir notendur - umfang gagnasafnsins – heimsóknir á vefi

Það bættist ekkert nýtt safn í aðildarhóp rekstrarfélagsins í liðnu áði. Greiddur á árinu voru 55 talsins, þar af voru 38 með sameignaraðild að félaginu og 17 með samstarfsaðild.

Töluverð aukning í fjölda virkra notenda í Sarpi varð á milli ára. Í byrjun maí 2020 eru samtals 241 notandi skráðir með virkan aðgang á innri vef Sarps miðað við 192 virka notendur í fyrra. Þar af eru 10 notendur tengdir viðhaldi og daglegum rekstri kerfisins þ.e. ekki starfsmenn aðildarsafna. Um 82% eða 198 notendur voru með kerfisaðgang sem gerir kleift að bæði lesa, skrá og breyta eldri færslum einhvers aðfangs í Sarpi (B – breytinga- og skráningaraðgangur.) 12% eða um 28 notendur voru einungis með lesaðgang að kerfinu (L - lesaðgangur) og 6% einungis með leyfi til að skrá nýtt en ekki breyta og lagfæra eldri skráningar (S-skráningaraðgangur)

Tekin var sú ákvörðun í fyrra að hreinsa til í notendahópi Sarps árlega og munu forstöðumenn fá póst frá fagstjóra að hausti til þar sem þarf að staðfesta virka notendur tiltekins safns.

Heildarfjöldi skráðra aðfanga í Sarpi þann 31. desember 2019 var 1.846.655 en var á sama tíma árið á undan 1.694.528 aðföng og svarar það til tæplega 9% nettó aukningar í skráningu á milli ára. Þar af eru 1.298.670 aðföng birt á sarpur.is í lok árs 2019, en voru 1.268.968 í árslok 2018 og er það rúmlega 2,5% aukning en var um 2% árið 2018.

Fjöldi aðfanga sem birt eru á leitir.is í apríl 2020 eru 1.305.589 aðföng en voru 1.272.620 á sama tíma í fyrra.

Heimsóknir á sarpur.is aukast ár frá ári. Á árinu 2019 voru heimsóknir 145.563 talsins en voru 124.117 árið á undan sem svarar til 18% aukningar á milli ára. Í byrjun árs 2019 var farið í kynningarherferð með það sem meginmarkmið að auðvelda landsmönnum að tengja heitið Sarpur við menningarsögulega gagnasafnið Sarp og sarpur.is og skýrir það að einhverju leyti aukinn fjöldi heimsókna.

Um helmingur þeirra sem sækja vefinn sarpur.is heim, eða 44%, koma í gegnum ýmsar leitarvélar, til dæmis Google. 43% koma beint inn á vefinn við að slá inn sarpur.is í vefslóð og síðustu 13% koma í gegnum samfélagsmiðla og heimasíður safna.

Á árinu 2019 bættust við 7 sýningar á sarpur.is. Alls eru því 54 sýningar í birtingu á sarpur.is en voru 49 árið á undan.

Nýjungar í kennslu - Almenn notendabjónusta

Á vef Landskerfis bókasafna, landskerfi.is er að finna þjónustuvef með fjölbreyttum leiðbeiningum um notkun Sarps auk verkbeiðnakerfis fyrir fyrirspurnir og hjálparbeiðnir frá starfsmönnum aðildarsafna Sarps. Mælt er til þess að starfsmenn stofni aðgang á vefnum til að fullnýta þá þjónustu sem þar er í boði og fá sem skjótust og best viðbrögð við þjónustuerindum. Um leið og aðgangur er stofnaður er mælt með því að notendur skrái sig á póstlista Sarps til að fá tilkynningar frá félaginu um uppfærslur Sarps, fyrirhuguð námskeið og fleira. Í maí á þessu ári höfðu 146 starfsmenn safna stofnað aðgang á vefnum og hefur því fjölgað lítið eitt frá síðasta ári þegar þeir voru 121 en 111 árið 2018.

Alls voru haldin tvö Sarpsnámskeið fyrir starfsmenn aðildarsafna í apríl 2019, eitt skráningarnámskeið, og eitt grunnnámskeið. Tvisvar sinnum voru auglýst námskeið að hausti til en vegna lélegrar aðsóknar féllu bæði námskeiðin niður. Í ljósi þess var fyrirkomulagið um kennslu og námskeiðshald tekið til endurskoðunar og ákveðið að vinna að því að gera kennsluefni í auknum mæli aðgengilegt á stafrænu formi. Skráningarhandbók Sarps 2.0 leit dagsins ljós og var formlega kynnt fyrir safnamönnum á svokallaðri „vinnustofu“ á Farskóla FÍSOS á Patreksfirði í október 2019. Þar var haldin vinnustofa um handbókina í samstarfi við skráningarstjóra Þjóðminjasafns Íslands, Þorvald Böðvarsson. Mikilvægi gæða skráningar í Sarp var rætt og ferlið í kringum skrif handbókarinnar kynnt. Almennt lýsti fólk yfir mikilli ánægju með að hafa í fyrsta skipti slíkar leiðbeiningar aðgengilegar um kerfið í heild sinni. Fagstjóri og skráningarstjóri Þjóðminjasafnsins unnu síðan upp úr skráningarhandbókinni 23 minnisblöð þar sem farið er yfir flest alla þætti kerfisins, skref fyrir skref á sjónrænan hátt. Minnisblöðin eru aðgengileg á þjónustuvef Landskerfis bókasafna.

Sem hluta af þessu verkefni er búið er að endurgera og birta 12 kennslumyndbönd á YouTube-rásinni <https://www.youtube.com/user/landskerfiogsarpur> og er ætlunin að þau verði enn fleiri. Markmiðið er að leiðbeina notendum kerfisins á fjölbreyttari hátt en verið hefur. Því er sömuleiðis búið að stofna Facebook hóp undir nafninu *Sarpur - Umræðuvettvangur fyrir skrásetjara*. Hópurinn á að vera vettvangur þar sem skrásetjarar geta leitað eftir aðstoð, leiðbeint öðrum og spjallað almennt um skráningu. Núna eru yfir 50 meðlimir í hópnum og verða vonandi fleiri þegar við höfum náð að virkja fólk til umræðna.

Lokaorð

Árið 2019 var áfram unnið að uppbyggingu Sarps en samhliða var markvisst unnið að þekkingaröflun vegna nýs kerfis sem taki við af Sarpi 3.0. Nýr þjónustusamningur við Landskerfi bókasafna til fjögurra ára var undirritaður á árinu en samstarfið hefur frá upphafi haft jákvæð áhrif á rekstur og faglegt starf félagsins.

Framundan er áframhaldandi vinna vegna framtíðarþróunar Sarps. Ákveðið hefur verið að hefja formlega þarfagreiningu og margvíslega undirbúningsvinnu vegna nýs kerfis á haustmánuðum 2020. Í ljósi umfangs vinnunnar hefur félagið ráðið verkefnastjóra í 70% starfshlutfalli til eins árs frá næstkomandi hausti til að halda utan um verkefnið og hefur Cecilie Gaihede verið ráðin til starfans. Aðkoma aðildarsafna og fulltrúaráðs að verkefninu mun skipta sköpum fyrir árangur þess. Biðlað er til forstöðumanna safna að gera völdum starfsmönnum kleift að taka virkan þátt í vinnunni sem mun fara fram frá hausti 2020 og til vors 2021.

Framkvæmdastjórn vill þakka fulltrúaráði og aðildarsöfnum Sarps fyrir gott samstarf á árinu. Sérstaklega skal skráningarstjóra Þjóðminjasafns Íslands, Þorvaldi Böðvarssyni, þakkað fyrir samstarfið og framlag hans til þróunar Sarps frá upphafi. Að endingu eru Sveinbjörgu Sveinsdóttur framkvæmdastjóra og Cecilie Gaihede starfandi fagstjóra Sarps og öðrum starfsmönnum Landskerfis bókasafna færðar þakkir fyrir árangursríkt starf í þágu félagsins. Vala Gunnarsdóttir fagstjóri er boðin velkomin aftur til starfa.

F.h. framkvæmdastjórnar Rekstrarfélags Sarps

Anna Guðný Ásgeirsdóttir, formaður

Gerður Róbertsdóttir, ritari

Inga Lára Baldvinsdóttir, gjaldkeri